

Es Nee och Nee?

PETER DEMANT



Dr Bürgermeister en Schildrath troot zoröck. Woröm es he egal. Hä wor dr mächtigste Mann em Städtche – dät em Stadtrod präsidiere, de Verwaltung leite. Et Maachzentrum. Dovan verstond hä nühs, ävver dat hät me öfters. Hätt och Kölle sin künne.

Nu moht ene neue gewählt werde.

Vürgeschlage wor dr Dieter Papp. Ne prächtige Kähl. E bessge knubbelig, ävver 'ne Kumpel, gradus, dät helpe, wo hä konnt. Keine Muuzepuckel. Als Fastelovendspräsident överall bekannt. Esu eine moht doch och Bürgermeister mache künne!

Ävver dann – de Wahl. 34 Mitglieder em Rat.

17 Stimme für Papp. Zehn däten sich enthalte (de neidische Konkurrenz). Zwei für Dr. Berners. Dä wor garnet opgestellt. Drei NEE. Ein für Donald. Wor och net opgestellt.

Wat nu?

Jetzt schlog de Stund für de Verwaltung. De Bürokrate.

Kann eine gewählt werde, dä garnet opgestellt es?

Es e NEE e NEE?

Wat, wenn Donald die mieste Stimme hät?

Ietstens es dat ene Knubbelfutz. E klein Männche. Un zweitens en Ent. Jot, Plattfööss hätten och dr Papp. Kein Bläck Fööss. Un – kann dä überhaupt Deutsch?

Moss dat oder kann dat fott?

De Bürokrate däte overläge. Nohdenke. Nohschlage en de Kommentare Kottenberg-Rehn, Darmstädter Kommunalpolitische Bläder, alles Gemeindeordnung (GO) NW usw. Woche verginge. Maachvakuum.

Dr „Vermerk“ wor dann zwei Sigge lang: Berners net opgestellt. Donald och net. Wor och en Ent. Also – fott domet.

Problematisch es ävver, wie e NEE zo werte es.

Am Enk – es et ungültig. E NEE es kee NEE. Do kanns bei dr Wahl net NEE sage, och wenn de dä net verknuse kanns.

Säht dr eine. Doch, säht dr andere. De mietste Lücke wollten Papp. Protete gegen de Bürokrate.

Interesseet die net. Endgültig Dürchenee en de Stadtverwaltung. Jede dät, wat he wollt, keine, wat he sollt, ävver all woren dobei.

Un Papp wollt jetzt suwiesu net mieh. Scheff von dä Bürokrate? Danke.

Wat ging övverhaup noch? Neuwahl! Zwei Woche hingerdren.

Dr Donald hat dovon gehürt. Wat für en Chance – endlich kunnt hä jet wääde! Dät kandidiere.

Un dann peng – bum – paaf- Donald – 18 Stimme. Dr Rest – ungültig.

Woröm dann dat?

De Nüsele! Et ging öm de Nüsele. Donald hat gestrunz wie zehn bläcke Trumps – ich besorge Millione! Un Arbeitsplätze!

Dr Pechvogel, Fründ von Micky Maus, gebore an 'nem Friedag, dr 13. Typisch. Dät wonne en Entehuse. Tireck nevw Schildrath. Es verhierot mit Daisy. Först Lejdi.

Wat wöod komme, wenn hä an dr Macht wor?

Zoesch wood „Entebross Peking“ un „Peking-Ent“ em China-Restaurant von dr Speisekaat gestrichen.

Stipfeföttche bei de Ruude Funke heeß jetzt „Enteföttche“.

Als Auto für dr Bürgermeister wood en „Ent“ angeschaff, 'ne Citroen 2 CeVau. Süht got us, Cabrio, blau-wieß natürlich.



Un dann – de Nüsele. Dovon hat Schildrath immer zo wenig. Donald och. Äver singe Ühm, dr Bertel, dä hätt! Hatt hä en Kondike beim Goldrausch gefonge. Bloß – dä es geizig wie all Schotte. Deht et Klopapier erömdrähe, op beids Sigge notze, säht mr.

Singem Neff Donald ävver däht hä Nüsele pumpe. Bloß 10% Zinse, aver keine andere wööd Schildrath noch jett borge. Die wore esu jet von pleite.

Nem geschenkte Pääd luurste net en de Schnüss.

Dagobert woss genau Bescheid: En Schildrath gov et fröher Erzbergbau. Blei, Kupfer, Zink hatte se gefonge. Ävver net opgepass: Do gov et nämlich deefer unge – Gold.

Ald bahl hat hä de Konzession – Donald wollt sich net kniestig zeige.

Die ahl Schächt wore noch do. Mr moht bloß neue Fahrstöhl enbaue. Deef eravv ging et. Noch deefer als wie fröher. Et Gold dät bahl leuchte – Dagobert kräg Stielauge. Streng wooden de Arbeider bewach, keiner konnt jet en de Ungerbotz fummele.

Bahl woodt boven en Goldschmuck-Manufaktur gebaut. Golde Uhre, Anhänger, Renge, Armriefe, Stecker für en de Nas, de Ohre, de Fott, de Buchnabel un esu wigger. Golde Lenkrad em Rolls Royce. Vom Bertel.

Un bahl wore övver dausend Arbeiter un Angestellte am wullacke. Dagobert dät och ene neue Geldspicher baue – deef em Berg Lüderich. Wo keiner dran konnt. Secherer als wie Fort Knox.

Nevve jedem Stadtbürokrat moht jetz en Ent setze. Us de Entegarde. Von weege ‚Enterevolu-tion‘. Zo bezahle von de Stadtbürokrate selvs. Kohm net got an. All däte pröttele. Streike. De Gewerkschaf dät schenge. Bahl ald mohten se all placke. Richtig ärbeide. Em Schacht vom Dagobert. Och dr Ferdi von Verdi. Dat däht su jet von wieh! Hatte se noch nie gemaht. Röggeping!

Ävver e Holzaug däht oppasse: Donald wor gar net zständig für de Konzession vom Ühm. Dat wor doch et Oberbergamp en Pusemuckel-Ichendörp. De Schmer dät beids kassiere.

Wat ävver noch schlemmer wor: Et däht rähne wie en Biess. En de Zupp un en de Kiess. Em Juli.

Sechs Dag lang.

De Goldmin däht avvsuffe.

De Rolls, Ferraris, Lamborghinis, Mc Larens, Bugattis vom Dagobert – zehn hat hä en dr Deefgarag – unger Wasser. Alles am A

Ente künne schwemme, ävver söns – keiner op dr Sechsmeter-Flutwell von dr Sülz am 14. Juli. Dat wor sons e klein Rinnsaal, ävver jetz – kein Überschwemmungsfläche, de Bröcke verstopp von Balke, Holzstämm, Badewanne, Öltanks.

De halve Stadt unger Wasser. Strom fott. Heizung fott. Glotzkess, Hääde, Kühlschränk, Klavier, öbele, Autos, Motorräder – alles am A...

Et Handy ging noch.

All Ente woode fottgeschwemp övver Agger, Sieg, Ring bes no Holland en de Nordsee. Jetz sen se beim Trump geland. Dä es och ene Donald un süht us wie en Ent.

Dr Lieve Gott es anscheinend ävver kein Ent.

Nix mieh Enteföttche.

Konnt et noch schlimmer komme?

Mr glöv et net, ävver zickdem es e Deckmadämche Bürgermester, genannt „De grön Tonn“. Fott wie e Brauereipääd.

Vür de nächste Wahl mösse all Kandidate ene biestige Sprochtest mache. Z. B.: Wat heeß Schaaf op Huhdeutsch? Wat heeß Schoof?

Wie övversetz me „Onse ahle Kaffeepott hätt en Blötsch en dr Schnut“?